



Vniuersa Theologia Scholastica, Speculatiua, Practica

Ad methodum S. Thomæ, quatuor Tomis comprehensa

Tanner, Adam

Ingolstadii, 1626

VI. An etia[m] certi gradus gratiæ, & gloriæ, omnesq[ue] actus ac media,
quibus prædestinati efficaciter promouentur ad gloriam, in indiuiduo &
secundum omnes suas circumsta[n]tias sint à Deo ...

[urn:nbn:de:hbz:466:1-72856](#)

DVB IVM VI.

An etiam certi gradus gratia & gloria, omnesq; actus & media, quibus prædestinati efficaciter promouentur ad gloriam obtinendam, in individuo, & secundum omnes suas circumstantias, sint à Deo prædefinita, ante prævisionem cooperationis, ipsamue cooperationem nostram.

S. Thomas 2. p. q. 23. a. 5. & 8.

Variè de hac re loquuntur Theologi. Etenim præter eos, qui dixerunt, Deum quidem antecedenti voluntate, & prædefinitio decreto efficaciter, seu indefinitè homines & Angelos saluare voluisse, seu etiam certum ac definitum numerum saluandorum prædefiniisse, ita ut minor esse non posset; neminem tamen in particulari eodem prædestinationis decreto prædestinasse; quos refert & refellit S. Thomas hic q. 23. art. 7. quoque etiam dub. 4. & 5. satis refutauimus; negatiuam sententiam primo tuerunt omnes illi, qui negant, Deum adultos prædestinasse ad gloriam, ante præscientiam meritorum; hi enim multo magis negant, certum aliquem gradum gratiæ & gloriæ, ipsosq; per se liberos actus, quibus gradus illi attingendi forent, fuisse à Deo ante præscientiam, aut saltē futuritionem cooperationis, seu determinationis liberae prædestinatos.

Secundo alij, vt refert Suarez hie lib. 1. de prædest. cap. 10. num. 3. docent, decretum illud prædestinationis ante prævisionem cooperationis fuisse quidem ad certas personas individuas præterminatum, non tamen ad certum terminum seu gradum gratiæ vel gloriæ; sed hunc primum fuisse decretum post prævisionem meritorum, seu cooperationis.

Tertio alij concedentes quidem, non solum certum etiam terminum seu gradum gratiæ & gloriæ à Deo ante prævisionem cooperationis fuisse definitum, sed etiam actus quoque ipsos in generi eodem decreti generi fuisse prædefinitos à Deo, negant tamen eos ante prævisionem aut futuritionem cooperationis nostræ, fuisse prædefinitos in particulari, & secundū omnes circumstantias.

Quarto Vasquez disp. 99. c. 7. & 8. & Molina citandus assert. 5. concedunt quidem actus salutares prædestinatorum, imo etiam alias bonos & salutares actus prædefiniri à Deo, ante prævisionem seu futuritionem cooperationis nostræ, in sua causa; quæ est gratia congrua; negant tamen, ita prædefiniri in leipsis; Quæ quidem sententia non tam est à prima sententia diuersa, quam quædam eius explicatio. Verior autem sententia in sequentibus assertionibus constituit, suppositis ijs, quæ de diuinis præfinitionibus generatim docuimus supra disp. 2. quæst. 10. dub. 6. & 7.

Assertio I. Actus salutares prædestinatorū, seu in particulari, seu in vniuersali, sicut & certus etiam

gratiae aut gloriæ grad⁹ prædefiniti à Deo, nō fuerūt ante prævisionē seu præscientiā conditionata liberæ cooperationis & determinationis nostræ. Ita communis ac certa omniū eorum, qui eiusmodi scientiam conditionatam agnoscunt, vt generatim dictum cit. q. 10. dub. 6. assert. 3. & 7. vbi etiam probauimus, nec posse quidem à Deo opus liberum vlo modo prædefiniri, seclusa scientia media seu conditionata. Ratio assertionis breuiter est. Quia scientia conditionata aliquo modo est necessaria in Deo, & antecedens omnem liberam & absolutam determinationem Dei, seu futuritionem rerum, vt suo loco dictum. Neq; vero de hac prævisione seu præscientia cooperationis conditionata est hoc loco controuerteria, sed solum de præscientia absoluta.

Assertio II. Decretum diuinæ prædestinationis ante prævisionem operum, seu cooperationis nostræ, respectu omnium & singulorum salvandorum, fuit determinatum ad certū gradum gloriæ tam essentialis, quam accidentalis; nisi quod gloria accidentalis supponens necessario peccatum, ante prævisionem absolutam eius peccati præfiri non potuit. Ita quoad priorem partem sentiunt omnes illi, qui prædestinationem ad gloriæ factam esse docent ante prævisionem operum supra dub. 3. relati. Ratio est. Quia prædestinationis singulorum ad gloriæ ex parte termini primarij, non fuit confusa & indeterminata. Posterioris partis, quā bene tuerit Suarez l. 1. de præd. c. 10. n. 7. ratio est. Quia alias oportet fateri, ipsum etiam peccatum saltem virtualiter à Deo esse prædefinitum, cū præfinito consequenti, etiā prædefinitum intelligatur antecedens, ad quod alterum necessariam & intrinsecam dicit habitudinem: peccatum autem prædefiniri à Deo non posse, patet ex disp. 2. q. 10. dub. 6.

Assertio III. Actus salutares prædestinatorum non fuerunt à Deo prædefiniti primum post præscientiam seu prævisionem absolutam cooperationis seu determinationis nostræ. Ita vniuersim etiam docuimus eodem loco supra cit. q. 10. dub. 6. post assert. 4. quam præter auctores inferius citandos pro assert. 6. tradit etiam Vasquez disp. 99. c. 7. n. 42. nec est quod sciam vllus classicus Doctor, qui oppositum doceat; imo idem Vasquez disp. 99. c. 5. ex communi sententia refellit Catharinum opusc. de præscient. c. vlt. Osorium l. 9. de Iustitia, Cordubam l. 5. q. 55. dub. 10. & Marsilium in 1. q. 45. a. 2. post conclus. 4. qui docuerunt, act⁹ saltē malos à Deo præfiniri præfinitione subsequente, non quidem ipsam prævisionem absolutam cooperationis nostræ, sed liberam tamen determinationem nostram, quæ prior est absoluta prævisione eiusdem, vt suo loco ex communi & certa sententia docuimus.

Ratio assertionis est manifesta: quia præscientia absoluta cooperationis seu determinationis nostræ supponit futuritionē absolutam eiudem: Ergo supponit etiam præfinitionem eiudem cooperationis nostræ; quandoquidem ipsa absolute futura esse non potest sine prævia præfinitione Dei, vt bene Vasquez ibidem, & dictum generatim cit. dub. 6. assert. 2. Quomodo enim aliquid boni esset, nisi Deus esse voluisse; in quo consistit di-

uina præfinitio. Cum ergo cooperatio nostra non sit præfinita à Deo primum post prævisionem absolutam cooperationis nostræ, nec actus etiam boni prædestinorum quantumvis liberi, præfiniti à Deo verè dici possunt primum post prævisionem cooperationis nostræ: quandoquidem est actus ipsi inesse perfecto ratione posteriores sunt determinatione seu cooperatione nostra, non tamen hæc minus libera est, quam actus nostri, nec hæc ab ea re ipsa differunt. Nec video, quomodo contrarium probabiliter defendi possit.

7 Assertio IV. Actus boni & salutares prædestinorum, omnes & singuli, etiam in particulari à Deo prædefiniti fuerunt, ante præscientiam seu prævisionem cooperationis nostræ. Sequitur ex assertione precedenti, eademque ratione probatur. Quia præscientia absoluta cooperationis nostræ, sive etiam actuum nostrorum, non solum non est prior absoluta futuritione cooperationis seu actuum nostrorum, verum etiam nec simul, sed posterior: Ergo etiam est posterior præfinitio eorumdem, quandoquidem futuri esse non possunt, nisi supposita diuina præfinitio, ut dictum.

8 Assertio V. Actus salutares prædestinorum in sua causa prædefiniti à Deo fuerunt absque nostro consensu, adeoque ante futuritionem absolutam libera determinationis nostra. Ita non solum docent omnes citandi pro assert. 6. sed ex ijs etiam, qui prædestinationem ad gloriam non existimant factam ante prævisionem meritorum., Molina 1.p.q.14.a.13. disp. 18. memb. 3. & Vafquez disp. 99. c. 7. & 8. & est communis: neque à quoquam iure negari potest, vt etiam generatim de quolibet bono & salutari actu virtutis dictum sit. q. 10. dub. 6. assert. 5. Ratio est clara. Quia opus bonum virtutis in sua causa prædefines Deus hoc ipso, quod prædefines vocationem congruam, ex qua, supposita scientia media, infallibiliter sequitur eiūmodi opus bonum: at vocationem congruam prædefines Deus absque nostro consensu, adeoque ante absolutam futuritionem, aut scientiam determinationis nostræ, vt certa & communis habet Doctorum sententia; quandoquidem ipsa est causa determinationis & cooperationis nostræ: Ergo & ipsum opus virtutis prædefines Deus in sua causa, absque nostro consensu, adeoque ante futuritionem absolutam libera determinationis nostra. Quod necessario fatendum est, etiamsi quis dicat, (quod tamen superius dub. 1. refutauimus) Deum non eligere pro elec- tis gratias congruas, neque efficaciam gratia priorem esse cooperatione nostra: quia nihil minus Deus ante cooperationem nostram, ijs qui saluantur, re ipsa decernit eam gratiam, cum qua per scientiam medium infallibiliter antea præderat eos cooperaturos; quo ipso iam cooperatio ipsa & opus bonum præfinitur à Deo in sua causa, ante cooperationem nostram, eiusq; prævisionem.

9 Assertio VI. Verius est, Deum actus salutares prædestinorum, vti & certum gradum gratiae sanctificantis, etiam in particulari, & iuxta omnes circumstantias, absolutè ac in se ipsis prædefine, ante futuritionem absolutam nostræ determinationis, sive consensus ad eosdem. Hæc est con-

clusio principalis in hac materia, & de qua sola ferè controversia hoc loco esse potest; quam tradunt primo omnes illi, qui docent, causam secundam à prima etiam physicè ac intrinsecè præterminari ad omnem actionem, speciatim Banes, Zumel, & omnes Thomistæ recentiores hic q. 23. art. 4. & 7. item Ferrariensis 3. cont. gent. cap. 89. Capreolus in 2. dist. 28. q. 1. a. 3. Eandem assertionem tuentur Suarez lib. 3. de auxil. cap. 17. à num. 8. & lib. 1. de prædest. cap. 10. num. 4. Mascalenes de auxil. disput. 2. part. 4. Henriquez lib. vlt. cap. 5. §. 1. & 4. & cap. 11. §. 6. lit. E.F. vbi addit etiam, *omnia & singula bona naturalia & moralia, que in mundo res ipsa sunt, ad eum modum prædeterminare Deum;* & citat pro eadem sententia Hispalensem, Palatium, Driedonem, Carthusianum, Tapperum, Viguerium, Vegam, item Scotum, Durandum, Heruazum, Bassolem, Maiorem, Liqueum cum Magistro in 1.d. 38. item Ariminensem d. 39. Marsilium in 1. que d. 45. a. 2. Certe Gabriel in 1. d. 33. q. vn. a. 2. referens sententiam Scoti dicit: *quod voluntas divina, que est prima regula contingentium, prius natura determinat contingens, quam intellectu divinis intelligat illa esse futura.* Et Scotus ipse in 4. d. 49. quest. 6. §. Di- co ergo, ait, *contra naturam voluntatis est, determinari à causa inferiori, quia hoc ipso non est superior: non est autem contra naturam eius determinari à causa superiori.* Agnoscit ergo Scotus, voluntatem saltem extrinsecè determinari, stante libertate, à Deo velut causa superiori.

10 Idem plane sentit S. Thomas varijs locis. Etenim 1.p.q.23. a. 7. docet, quod quemadmodum Architectus ex se ipso excoigit determinatam mensuram, & etiam determinatum numerum mansionum, quæ vult facere in domo, & determinatum numerum mensurarum parietis vel tecti, ita etiam certi est Dei numero prædestinorum, non solum per modum cognitionis, sed etiā per modū cuiusdam principali præfinitionis. Vbi plane loquitur de prædestinatis in particulari, etiam secundum determinatam mensuram gratie & gloria, adeoque etiam mediorum, quibus ad eam pertingant, vti etiam prius in simili de determinato numero mensurarum parietis vel tecti, ipsarumque mansionum locutus fuerat.

Item in 1. part q. 23. a. 1. ad 1. & q. 5. de verit. a. 5. ad 1. & 3. cont. gent. c. 90. exponens dictum Damasceni in cōtrarium obiectum, docet, eum non quamcunq; nostrorū actuū prædeterminationem negare voluisse, sed ē dūtaxat, quæ est ē impositione necessitatē. Vbi manifeste agnoscit S. Thomas, voluntates nostras à Deo prædeterminari, etiā salu libertate: quod gererat pronūtiatū, minimū de actibus salutarib⁹ prædestinatū accipiendo videatur: et si nō ignorē, eam S. Thomas explicationem à quibusdam recentioribus, qui hoc loco contraria sententiam tuentur, rejici & impugnari.

11 Item in 1. 2. q. 112. a. 4. S. Thomas aperte refert diuersitatem cooperationis cum gratia in diuersitatem gratiæ præuenientis, adeoq; in decretri Dei diuina gratia dona singulis decernēs ac prædefiniēs: [Ex parte subiecti, inquit, gratia potest suscipere magis vel minus; prout scil. vn⁹ perfecti⁹ illustrat à lumine gratiæ, quā alius. Cui⁹ diuersitatis ratio

ratio quidem est aliqua ex parte præparantis se ad gratiam; qui enim magis le ad gratiam præparat, plenioram gratiam accipit. Sed ex hac parte non potest accipi prima ratio huius diuersitatis; quia præparatio ad gratiam non est hominis, nisi in quantum liberum arbitrium eius præparatur, à Deo. Vnde prima causa huius diuersitatis accipienda est, ex parte ipsius Dei, qui diuersimodè hæc gratia dona dispensat, ad hoc, quod ex diuersis gradibus pulchritudo & perfectio Ecclesiæ consurgat; sicut etiam diuersos gradus rerū instituit, ut esset uniuersum perfectum. Vnde Apostolus Ephes. 4. postquam dixerat, *Vnicuique data est gratia secundum mensuram donationis Christi;* enumeratus diuersis gratijs, subiungit, *Ad consummationem sanctorum, in adiunctionem corporis Christi.* Et 3. p. q. 7. a. 10. ait: *plenitudinem gratiae una est plenior altera, secundum quod aliquis est diuinitus præordinatus ad altiore vel inferiorem statum.* Ita S. Thomas. Omitto locum S. Thomas q. 3. de potent. a. 7. vbi planè etiam physicam prædeterminationem ad singulos actus afferere videtur; quod tamen alibi reuocat, ut dictum supra disp. 2. q. 11. dub. 1.

12 Probat assertio primò ex scriptura, quæ huic sententia non parum faret. Insignis locus est Eccli. 33. à v. 10. *Omnis homines de solo, & ex terra, unde creatus est Adam.* In multitudine disciplina Dominus separavit eos, & immutauit vias eorum. *Ex ipso benedix & exaltauit,* & ex ipso sanctificauit, & ad se applicauit: & ex ipso maledixit & humiliauit, & conuertit illos a separatione ipsorum. Quasi filii regnū in manu ipsius, plus mare illud & disponere. Omnes viae eius secundum dispositionem eius, sc̄ homo in manu illius, qui se fecit, & redet illi secundum iudicium suum. Vbi planè significatur, Deum ex ipso, & ante prævisionem, in modo futuritionem absolutam cooperationis & determinationis nostræ, suo arbitratu disponere & præfinire vias nostras & opera, sicut filius de Iuto disponit modum formandi vas: quod quidem pro diuersitate subiectæ materiae, de operibus bonis & salutaribus à Deo ipso intentis propriè ac positivè accipiendum est; de malis autem non nisi quoad permissionem. In quem sensu etiam loquitur Ecclesiasticus c. 11. v. 15. *Dilectio & via bonorum apud ipsum; nimirum peculiari modo præordinata sunt.*

13 Huc spectat illud Prouerb. 21. v. 1. *Corregis in manu Domini, sicut diuisiones aquarum; quocunq; voluerit, verteret illud;* hoc est inclinabit & permouebit illud, vtq; prauia aliqua, & non solum concordante vel subsequente dispositio sue decreto. Item Esther 13. v. 9. *Domine Rex omnipotens, in dilectione tua cuncta sunt posita; necest qui tua posse resistere voluntati, si decreveris salvare Israēl.* Vbi certe non est sermo de decreto conditionato; quia huic facile est resistere: sed de decreto absoluto; cui licet absolute resistere possimus, fieri tamen non potest vnquam, vt re ipsa non impleatur. Et valde significanter Prophetæ Ieremias c. 10. v. 23. *Scio Domine quia non est hominis via eius; nec viri est, ut ambulet & dirigat gressus suos; nimirum primordialiter, & secundum primam quasi radicem, ex qua emanant omnia opa bona, salua interim libertate hominis.* Quo loco eodem sensu vitetur Am-

brosius, & ex codem sape Augustinus, ut alibi dictum, & denuo inferius dicetur.

Huc spectat etiam illud Ephes. 1. v. 3. *Benedictus Deus & Pater Domini nostri Iesu Christi, qui benedixit nos in omni benedictione spirituali in cœlestibus in Christo, sicut elegit nos in ipso, ante mundi constitutionem, ut essemus sancti & immaculati in charitate. Qui prædestinavit nos in adoptionem filiorum per Iesum Christum in ipso, secundum propositum voluntatis sue.* Et c. Vbi vim habet illud, Deum benedixisse nos in omni benedictione spirituali, sicut elegit nos; hoc est, secundum quod elegit nos, vt essemus sancti; item prædestinasse nos in adoptionem filiorum, idq; non conditionate cum dependentia à nostra cooperatore, sed secundum propositum seu placitum voluntatis sua. Quæ omnia de donis cœlestibus, & gratia adoptionis, etiam in particulari, deque efficaci & absoluto, non conditionato decreto accipienda sunt, vt inferius ex Augustino magis declarabitur.

Item Ephes. 1. v. 10. *Ipsius enim sumus factura, creati in Christo Iesu, in operibus bonis, quæ præparauit Deus, ut in illis ambulemus.* Vbi rursum præparare seu decernere (efficacitq; decreto) opera bona, vt in illis ambulemus, non significat conditionatum decretem, seu præfinitionem, si nimirus nos ipsi ad ea determinemus, sed absolutum; alioquin non dixisset, *ut in eis ambulemus, sed si in eis ambulare velimus.* Vnde etiam Athanasius in eadem verba: *sc̄ens autem, inquit, hec parauit Deus, quæ differri non poterunt, neque prætermitti, quin peragantur, tanquam diuinitas sint præfinita, idque per multam erga nos prævidentiam.* Si autem solum sub conditione præfinita essent, prætermitti vriq; possent, non solum in sensu diuiso, sed etiam in sensu composito.

Secundò probatur assertio ex SS. Patrib⁹. Certe tam Augustini fuisse sententiam, vtq; adeo perspicuum est visum aduersarijs, vt Faustus Regiensis duos etiam libros de libero arbitrio aduersus Augustinū, suppresso tamen eius nomine, scriperit, in quibus eam sententiam magnopere impugnat, quæ dicit, ante præscientiam boni vel mali vius liberi arbitrij, Deum absoluto decreto prædefinisse actus humanos, quibus prædestinati saluantur. Vnde lib. 1. de grat. & lib. arb. c. 10. explicans Faustus illud, [Et tunc reddet ynicuiq; secundū opera sua, ait: Aduerte, quia dum dicit, secundū opera sua, salutem hominis, non in prædestinatione factoris, sed in operatione famulantis largitor gratiæ collocauit.] *Vbi prædestinatione oponit libera operationis hominis.* Etc. 21. [Igitur, inquit, dum liberi interempto arbitrij, in alterutram partem, omnia ex prædestinatione statuta & definita esse pronuntiat, etiā suprema remedia pœnitentia sensu abruptæ impietatis eviciunt. Item cap. 10. expōens illud, Potens est enim Deus statuere illum, ait: Aperte ostendit, statum hominis in diuersa, non pro constitutione Dei, sed pro arbitrij libertate posse versari. Et lib. 2. c. 2. *Præscientia, inquit, & prædestinationem Dei malè intelligunt, astruentes, quod inde humanoru[m] actuū causa nascatur.* Et infra: Non ita est, hoc potius agnosce, quod præscientia Dei de materia humanorum actuum sumat exordium. Quid de nobis præscrire ac præordinare debeat.

14

Deus, quantum pertinet ad futurum, in profectu hominis defectuque consistit. *Etcap. 3.* Ac sic, inquit, nisi præscientia explorauerit, prædestinatio nihil decernit.] Vnde de ijsdem Semipelagianis B. Prosper in epist. ad Augustinum: [Remoueri (auint) omnem industriam, tollique virtutes, si Dei constitutio (seu præfinitio) humanas præueniat voluntates.

15

Eandem vero sententiam ipsemet Augustinus in varijs locis non obscurè tradit. Ut in libro de prædest. sanct. capite decimo octauo. *Intueamur*, inquit, verba Apostoli (Ephes. 1.) atque videamus, utrum propterea nos elegitur ante mundi constitutionem, quia sancti & immaculati futuri eramus, an ut essemus? Benedictus, inquit, Deus & Pater Domini nostri IESV CHRISTI, qui nos benedixit in omni benedictione spiritali in cœlestibus in Christo; scilicet electi nos in ipso ante mundi constitutionem, ut essemus sancti & immaculati. Non ergo quis futuri eramus, sed ut essemus. Nempe certum est, nempe manifestum est; ideo quippe tales eramus futuri, quia elegit ipse, prædestinans, ut tales per gratiam eius essemus. Ita ergo nos benedixit benedictione spiritali in cœlestibus in CHRISTO IESU, scilicet electi nos in ipso ante mundi constitutionem, ut essemus sancti & immaculati in confecta eius, in charitate, prædestinans nos in adoptionem filiorum per IESVM CHRISTVM, in ipsum. Deinde quid adiungat attendite, secundum placitum, inquit, voluntatis sue; ne in tanto beneficio gratie DEI, placito gloriemur voluntatis nostræ.

16

Et infra: Elegit ergo nos Deus in Christo ante mundi constitutionem, prædestinans nos in adoptionem filiorum, non quia per nos sancti & immaculati futuri eramus, sed elegit prædestinavit ut essemus. Fecit autem hoc secundum placitum voluntatis sue, ut nemo de sua, sed de illius erga se voluntate glorietur: fecit hoc secundum diuinitatis gratiae sua, secundum bonam voluntatem suam, quam propria in dilecto filio suo, in quo forte fortis consecutus, prædestinari secundum propositum non nostrum, sed eius qui uniuersa operatur, usque adeo ut ipse in nobis operetur & velle. Operatur autem secundum consilium voluntatis sue, ut simus in laudem gloria eius. Hinc est autem, quod clamamus, ut nemo gloriatur in homine, ac per hoc nec in se ipso; sed qui gloriatur, in Domino gloriatur, ut simus in laudem gloria eius. Ipse quippe operatur secundum propositum suum, ut simus in laudem gloria eius, utique sancti & immaculati, propter quod nos vocavit, prædestinans ante mundi constitutionem. Ex hoc proposito eius, est illa electorum propria vocatio, quibus omnia cooperantur in bonum: quia secundum propositum vocati sunt sancti, & sine penitentia sunt dona & vocatio Dei. Ita Augustinus.

17

Quibus verbis non vno tantum modo tradit hanc sententiam. I. quia cum Apostolo absolute, ut verbas sonant, docet, Deum nos elegisse, utique ante determinationem liberi arbitrij nostri, ut essemus sancti; non sanè indefinitè solum, & in genere, sed particulatum ac definitè, prout decreti diuini perfectio postulat. II. Cum ait, tales (utique in particulari, cum hoc & tanto gradu, non alio; cum his, non alijs operibus) fuissent nos futuros, quia elegit ipse, prædestinans, ut tales per gratiam eius essemus: quo sanè loquendi modo nun-

quam veteretur Augustinus, nec quisquam vere vti posset, de actibus malis & peccaminosis, quantumuis & hos Deus quoad substantiam præfinerit sub conditione, seu concomitante ad determinationem liber arbitrij nostri, ut dictum cit. disp. 2. q. 10. dub. 6. assert. 4. Loquitur ergo Augustinus hic dealia præfinitione, quam quæ actibus etiam malis communis est. III. cum ait, elegisse nos & prædestinasse hoe modo ad sanctitatem, secundum placitum voluntatis sue, hoc est, ex se ipso, non expectato nostro consensu seu operatione. IV. vt nemo, inquit, de sua, sed Dei erga se voluntate glorietur: posset autem homo gloriar, si diuina elecio & præfinitio ad sanctitatem nostra voluntatis consensum expectaret, non præuerteret. V. cum ait, ex hoc in proposito esse illam electorum propriam vocacionem, quibus omnia cooperantur in bonum. Vbi perspicue docet, ex proposito & electione ad sanctitatem consequenter decerni & conferri votationem illam congruam, electorum propriam; ac proinde sanctitatem nostram iustitiam à Deo prædestinari & præfiniti non solum mediate in ipsa gratia congrua, sed etiam priusquam gratia vocans nobis decernatur; cum huius decretum præfinitionem sanctitatis subsequatur, ut inferius dicimus.

Rursum de prædest. sanct. cap. 19. & 20. [Non quia credidimus, inquit Augustinus, sed vt credimus elegit nos, &c. Agit quippe Deus, quod vult in cordibus hominum, vel adiuuando, vel iudicando, vt etiam per eos impleatur, quod manus eius & consilium prædestinavit fieri. Item lib. de bono persuer. c. 22. Ita se habet, inquit, de prædestinatione definita sententia voluntatis Dei, ut ex infideliitate veneritis ad fidem, accepta voluntate obedienti, & accepta perseverantia maneat in fide, &c.]

Et libro 2. de pecc. mer. & temiss. capite 17. cum ex Ieremias cap. 10. attrulisset illud, *Sic dominus, quia non est in homine via eius, nec viri est, ut ambulet & dirigat gressus suos, subiungit: Hoc ergo precipue commendatur, hoc in sapientia & scientia thesaurum in Christo abscondit, quācum existimare audeo, precipue docetur & dicitur. Ideo quisque nostrum bonum opus suscipere, agere, implere, nunc scit, nunc nec sit, nunc delectatur, nūc non delectatur, ut nauerit, non sua facultatis, sed diuersi munieris esse, vel quod scit, vel quod delectatur: ac sic ablationis vanitas sanctetur; & sciat, quām vere non de terra ista, sed spiritualiter detinunt, Dominus dabit suavitatem, & terra nostra dabit fructum suum.*

Item libro de correptione & grat. capite nono. [Nullus, inquit, prædestinatorum ex bono in malum mutatus finit vitam; quoniam sic est ordinatus, & ideo Christo datus, vt non pereat, sed habeat vitam æternam, &c.] Qui etiam ibidem capite septimo effectus, qui ex vi diuinæ prædestinationis subsequuntur, fusè commemorat.

Cum his consonat illud Augustini in Soliloquijs capite vigesimo sexto, vbi ait: [Antequam enim nascerer ego filius ancillæ tuæ, Domine spes mea ab uberribus matris meæ, tu præuenisti, præparasti mihi semitas, quibus incederem & veniam ad gloriam domus tuæ. Priusquam me formares in utero, nouisti me, & antequam exire de vulna, quicquid tibi placuit, præordinasti

de.

de me.] Possent in eundem sensum alia complura ex S. Augustino adduci, sed hæc in præsentiarum sufficiant. Vide tamen paulo post rationem tertiam.

Ex alijs Patribus, præter Athanasium paulò superius adductum, Theodoretus in illa verba-Ephes. I. Elegit nos in ipso, ait: Ab initio enim, inquit, antemundi constitutionem, ea quæ ad nos pertinebant, præficiunt & prædefiniunt &c. Præficiunt nos, & dilexit, & nostram vocationem præconstituit, vt nos siliorum adoptionis donum perciperemus &c. Secundum propositum voluntatis sua.

Et Hieronymus lib. 3. cont. Pelag. cum ex Proverb. 16. recitatet hæc verba: Deuoluimus super Dominum opera tua, & firmabuntur cogitationes tuae addit: Tunc euomus nostra cogitatio confirmatur, quando omne quod agimus quæ super stabilem & solidam petram, Domini adiutorio deuoluimus, eique cuncta reputamus. Deuoluimus autem propriissimum super Dominum bona opera nostra, quando ea primordialiter ad ipsam Dei prædestinationem referimus.

Huc spectant etiam illi Patres, qui docent, Deum malum, etiam poenæ, seu actiones malas non prædestinasse, sed solum bonas. In quibus Concilium Arausicanum II. can. 25. Aliquis vero, inquit, ad malum diuina potestate prædestinatos esse, non solum non credimus, sed etiam sunt, quicquid malum credere velint, cum omnibus defestationibus in illos anathema dicimus. Idem repetit Concilium Valentinius sub Lothario c. 3. Et Augustinus, seu Prosper ad articulos falsos impositos a. 10. Dei prædestinatione nuncquam extrahibilem, nuncquam extra insitum est &c. Adulteria enim maritatarum, & corruptelas Virginum non infirmare nouit sancta diuinitas, sed damnare; non disponere, sed punire. Et a. 10. Nihil talium negotiorum Deus prædestinavit ut fierent, neq; illam animam ne quiesceretur piterat, ut cura, ad hoc, ut taliter viueret, preparavit.

Similia habet Prosper ad obiectiones Vincenzianas, & ad capitula Gallorum c. 1. Prædestinatio, inquit, fides multa, & scripturarum auctoritatibus unita est; cui millo modo fas est, ea quæ ab hominibus male aguntur, ascribi. Idem ex instituto probat Fulgentius toto lib. 1. ad Monymum, vbi inter alia: Queramus itaq; utrum credendum sit, Deum iniuriorum opera prædestinare, pro quibus eos condemnem, scilicet in sanctis prædestinare dicitur, quod coronet. Et infra: Iniquus ad supplicium in se prædestinavit, quis eorum mala opera licet futura præscribet, non tamen ipse prædestinavit, ut futura essent, quia non ipse facit, ut facerent. Et infra: Præficiunt voluntates bonas & malas, prædestinavit autem non malas, sed solum bonas.

Quæ testimonia ad hunc sensum aptissime intelliguntur, quod est. Deus præfinitione concomitante actiones etiam malas, in quantum entia sunt, & præfinitione etiam consequente malum poenæ, Deus ab aeterno præfinierit, vt alios Patres loquentes vidimus supradisp. 2. q. 10. dub. 7. assertio. 1. nihilominus tamen absolutè non prædestinasse aut prædefinisse, non solum quia eas in quantum male sunt non prædestinavit, sed etiam quia non prædestinavit eas, etiam in quantum entia sunt, prædestinatione absoluta ante cooperationem nostram; vt bene etiam intellexerunt Molina q. 14. a. 13. disp. 18. m. 3. & Suarez opusc. de cœurs.

Dei lib. 2. de concursu. Dei c. 4. qui eodem etiam sensu absolutè negant. Deum actus malos præficiunt & seū prædestinasse. Cum igitur SS. Patres doceant, Deum actus bonos & salutares prædefinire eō modo, quo actus malos non prædefinit, plati sentiunt, illos absolutè à Deo præfiniri, præfinitione seilicet antecedente cooperationem futuram, & non solum conceonit.

Tertiò probatur assertio ratione. Primo, quia qui efficaciter intendit finem, ordine intentionis prius vult ea media, quæ sunt propria fini, quam quæ ab eo remotiora: atqui liberi actus boni sicut & ipse gradus gratia sanctificantis, libera cooperatione prædestinata acquirendus, sunt media propria fini, quam quæ a solo Deo efficiuntur, & in prima vocatione congrua consistunt: Ergo illa prius ratione sunt à Deo volita, quam ista: ergo si, vt authores opposite sententiae partim fatentur, partim necessarij fateri debent, hæc fuerunt prædefinita non solum ante præscientiam liberae cooperationis nostræ, sed etiam ante futuritionem absolutam nostræ cooperationis, multò magis illa.

Secundo, quia moraliter idem est, eiusmodi actus bonos in particulari ac in individuo prædefiniri in se, vel in sua causa, cum ergo negari non possit, eos absolute & antecedenter prædefiniri in sua causa, vt dictum assert. 5. frustra negatur, eos prædefiniri in se.

Tertiò. Si Deus antecedenter ad determinationem voluntatis nostræ absolute futuram, præmouet efficacis gratia auxilio ad actiones salutares, tunc etiam easdem antecedenter ad eandem determinationem præfinit; non solum quia eadem est utroque ratio; sed etiam quia illa præmotio ex hac præfinitione nascitur: prius enim efficaciter decernit præmouere, quam re ipsa præmoueat: sed verum est antecedens, nec à quoquam potest negari: & patet ex Augustino varijs locis, præficiunt lib. de corrupt. & grat. c. 14. vbi ait: Deo volenti saluum facere, nullum hominum resipit arbitrium. Sic enim velle & nolle in volentibus aut nolentibus est potestate, ut diuinam voluntatem non impediatur, nec superpetrare. &c. Non est itaq; dubitandum, voluntati Dei, quin in cœlo & in terra omnia quæcumque volunt facit, & qui etiam illa que futura sunt facit, humanas voluntates non posse resistere, quo minus faciat ipse quod vult, quandoquidem etiam de ipsis hominum voluntatibus, quod vult cum vult facit. &c. sine dubio habens humanorum cordium quod placaret inclinandorum omni potentiā simam potestatem.

Quod probat etiam ex illo 1. reg. 10. Et abiens potentes, quorum tetigis Deum corda cum Saule: & addit: Nunquid aliquis dicturus est, non iterum fuisse cum Saule quenquam eorum, quorum tetigis corda Deus, ut irent cum illo? aut iste aliquem pestilentum, quorum ut hoc facerent corda non tergit? Et mox de Abisai ex 2. Paralip. 12. Nunquid ille, inquit, posset aduersari voluntati Dei, & non potius eius facere voluntatem, qui in eius corde operatus est per spiritum suum, quo induitus est, ut hoc vellet, diceret, & faceret? Et infra: Intus egit, corda cœnuit, corda mouit, eosque voluntatibus eorum, quas ipse in illis operatus est, traxit. Si ergo cum voluerit Reges in terra Deus constitutere, magis habet in potestate voluntates

tates hominum, quam ipsi suas, quis alius facit, ut salubris correptio, & fiat in corupti corde correctio, ut cœlesti constituantur in regno.

Quarto, quia præfinitio hæc ex una parte nil derogat iustitia diuinæ, aut virtuti meritorum, vt dictum supra dub. præc. nec libertati arbitrij, vt dictum cit. disp. 2. q. 10. dub. 7. ex altera vero parte gratiam & perfectionem diuinæ prouidentiæ, simulque amorem erga prædestinatos valde commendat ergo rectius affirmatur, quæ negatur.

25 Quinto, quia id negari vix potest de quibusdam actibus supernaturalibus pertinentibus ad bonum commune omnium prædestinatorum, vt est consensus B. Virginis in opus Incarnationis Verbi: actus voluntatis Christi, quo mortem acceptauit, prædicatio Apostolorum. &c. vt ex communione bene Henriquez lib. vlt. c. 11. §. 2. & 6. & Suarez opusc. loc. cit. Cur ergo negetur de actibus salutaribus prædestinatorum?

An vero idem etiam dicendum sit de actibus bonis, præsertim supernaturalibus, reproborū, magis incertum est. Affirmat quidem cum Thomistis recentioribus Henriquez lib. vlt. c. 11. §. 6. lit. E. & Suarez lib. 3. de auxil. c. 17. anum. 8. id probabile censet, atque ita etiam absolute & indiscriminatum loqui videtur SS. Patres, & ex parte etiam Scriptura loc. cit.

In contrarium tamen videtur esse illud, quod docet S. Thomas hic q. 23. art. 7. vbi erga reprobos tantum generalem tribuere Deo videtur prouidentiam. Cum enim dixisset, certum esse numerum prædestinatorum, non solum per modum cognitionis, sed etiam per modum cuiusdam principali præfinitionis, subiungit: Non sic autem omnino est de numero reproborum, qui videtur esse præordinati à Deo in bonū electorū, &c.

26 Sed hoc nihil obstat, quo minus supposita reprobatorū existentia, etiam ipsis Deus præfinuerit bonos eiusmodi actus, quando prefertim multi ex illis fuerunt media salutaria ad exequendam electionem saluandorū: & quia id magis Scriptura & SS. Patribus consentaneum est, vt diximus, rectius affirmatur; et si quidem sola per se subordinatione causæ primæ ad secundam id minimè conuincat, vt ex dictis disp. 2. q. 10. dub. 6. colligi potest.

Accedit quod Caietanus eod. art. 7. explicans S. Thomam docet reproborum numerum ex parte subiecti, seu quod est naturale, etiam prædefinitiū Deo certum esse; quanto magis hoc diceret de actibus eorumdem supernaturalibus?

27 Assertio VII. Tametsi, vt dictum, electorum actus supernaturales singuli, vt & alij salutares actus eorumdem, ac media specialia singula, quibus efficaciter perducuntur ad beatitudinem, sive pendant à solo Deo, sive etiam à cooperatione liberti arbitrij, in individuo & iuxta omnes circumstantias, etiam ante liberam determinationem arbitrij, sint à Deo præfinita; et tamen hoc inter illa discriben, quod actus illi, eaque media, quæ necessario & essentialiter supponunt peccatum, vt est actus pœnitentia, & passio Christi &c. non fuerunt prædefinita ante præscientiā ipsius peccati, quod supponunt: etiamsi cæteri præfiniti sint ante præscientiā omnis peccati. Huius assertio postrema pars patet ex dub. 8. vbi ex instituto probabim⁹, præ-

destinationem ad gloriam omniū, tam hominum quam Angelorum factam fuisse ante permissionem seu prævisionē peccati. Est autem eadē ratio prædestinationis seu electionis eorum mediiorum, quæ necessario non presupponunt peccatum.

Prima pars patet ex dictis assert. præced. in qua speciatim de actibus salutaribus electorum quibuscumque, sive supernaturalibus, sive etiam naturalibus, quibus efficaciter perducuntur ad beatitudinem actū est; eadēq; imo potiore est ratio aliorum mediiorū, quæ non ita immediate pendent à cooperatione liberi arbitrij: è quibus etiam nonnulla, ex aduersitate quoq; sententiæ authorib⁹ concidunt, à Deo esse præfinita ante determinacionem liberi arbitrij, vt dictum.

Secundam partem prater eos, qui vniuersim docent, actus liberos in se non esse à Deo præfinitos ante determinationem, seu quod idem est, ante futuritionem absolutā determinationis nostræ, in quibus Molina, Vasquez, & alij, docent etiam Suarez cit. lib. 1. de præd. cap. 10. n. 4. & cap. 13. n. 3. & 10. & lib. de auxil. cap. 17. à n. 8. & fere Henriquez lib. vlt. c. 6 § 4. & c. 12. § 2. eti repugnant Thomistæ quidam recentiores, post Heruæum in 1. d. 40. qui vti putant, omnes actus etiam malos, in quantum entia sunt, prædefiniti à Deo ante liberam determinationem nostram, ita etiam docent, actus bonos tametsi necessario supponant peccatum, præfiniri ab eodem ante prævisionem peccati. Sed probatur ea pars assertionis. Quia qui absolute & sine conditione efficaciter vult aliquid fieri, vult eti fieri, seu esse ea, quæ ad id necessario supponuntur: vt si Index absolute & sine conditione efficaciter vellet exercere actum Iustitiae vindictiæ, deberet etiam velle, vt sit peccatum, quod actus illè necessario supponit: & si mediebus absolute & efficaciter vellet sanare, etiam non supposita prævisione vel existentia morbi, tum is etiam necessario velle deberet morbi existentiam, sine qua sanatio esse non potest: ergo pariter etiam si Deus absolute & sine conditione vellet aliquem actum ex se bonum esse aut fieri, qui necessario & intrinsece supponit peccatum, is hoc ipso deberet velle peccatum, quod is act⁹ necessario supponit: atquero impossibile est, vt Deus velit peccatum: ergo etiam impossibile est, vt ex se absolute & absque conditione, seu ante prævisionem peccati, velit eos actus bonos, sive media salutis, quæ necessario supponunt peccatum.

Assertio VIII. Inter ipsa quoque media specialia salutis à Deo particulatum prædefinita, aliquis est ordo, vt nimis ea Deus secundum rationem prius præfinierit, quæ sunt propinquiora fini, quæ remotiora, puta actus bonos & salutares prædestinatorum ante auxilia gratia præuenientis certum item gradum gratia sanctificantis ante gratiam præuenientem, & forte etiam ante ipsos actus salutares prædestinatorum. Hæc assertio est ex mente authorum, quos pro assertione 6. citauimus, quam speciatim tuerit Suarez lib. 1. de prædest. c. 13. num. 7. Probatur & declaratur. Quia vniuersitas fieri solet etiam in humanis, vt ordine intentionis priora sint media, quæ proprius cooperantur ad finem, quæ remotiora, vt suo loco

genera-

generatim dictum disput. 2. quæst. 10. dub. 6. Et ratio est. Quia propinquiora illa media habent se instar finis, respectu remotiorum.

30 Quia verò dubium videri potest, an gratia habitualis sanctificans proprius conducat ad beatitudinem, quam merita hominis adulti, quæ in gratia sanctificante fundantur, idcirco etiam dubitari potest, an merita prædeterminant ante gratiam sanctificantem, vel è contra. Nihilominus quia merita sunt causa partim dispositiva ad primam gratiæ, (loquendo scilicet de merito gloriæ, quod continetur ultima dispositione ad gratiam, quodq; re ipsa iam coniunctam habet gratiam, ut suo loco de gratia dicetur) partim causa effectiva moralis augmenti gratiæ, illiusq; demum gradus gratiæ, cui velut semini gloriæ ultimatè & immediate respondet destinatus à Deo gradus gloriæ, probabilius est, gratiam sanctificantem habitualem, eiusq; certainam mensuram prius à Deo praesinitam esse, quam merita; præsertim cum primum hominis adulti meritum, licet ratione præsupponat gratiam, non tamen natura; cum è contrario potius ordine naturæ gratia prima sanctificans procedat ab actibus illis bonis, nō quatenus sunt merita gloriæ, sed quatenus sunt dispositiones ad gratiam, ut suo loco in 1. 2. fuisse docetur. Eodemq; modo, licet posteriora hominis merita & ratione & natura supponant priorem aliquæ gratiæ gradum in homine, non tamen gradum illum subsequentem, qui per meritum acquiritur, sicut nec gradum ultimum gratiæ homini adulto à Deo per posteriora ciuiusmodi merita acquirendum.

31 Quia ratione non tantum Vasquez, alij; authores refelluntur, qui remota illa media prius à Deo intenta & decreta esse docent, quam propria; sed etiam Molina, & alij, qui vt difficultates omnes effugere videantur, docēt, media non cum aliquo ordine prioris ac posterioris, sed simul omnia à Deo fuisse decreta & præordinata; quorum fundamenta satis hactenus, præsertim dub. 2. & 4. refutauimus. Rectè igitur Henriquez lib. vlt. c. 6. §. 4. pronuntiavit, hanc sententiam esse sacris scriptarib; ac Patribus consentaneam, ut salua libertate hominis, Deus non solum quosdam, sed omnes liberos hominum actus bonos, cum suis boni circumstantijs prædefinias. Quod si certa adhuc ratio inventa non esset, qua hanc sententiam concinnavimus, nulla tamen evidenter argumento potest impugnari.

32 Contra hanc doctrinam præsertim assert. 6. & 8. propositam, obicitur primò, eam prædefinitionem singulorum operum non videri satis confistere cum perfecta & plenissima libertate, & scripture Eccli. 15. Deus reliquit hominem in manu consilij sui. Et c. 31. Qui potuit transgredi, & non est transgressus. Etsi enim non tollat indifferentiam intrinsecam voluntatis, tamen tollit indifferentiam extrinsecam eiusdem, eam extrinsecus prædeterminando ad omnia illa opera. Et confirmatur. Si homo sciret decreta illa Dei absoluta, non censeretur esse reliquit in manu consilij sui: quia iam videret se diuino consilio circa singula præuentum, nec fieri posse, vt in re aliud & alter fiat. Ergo pariter etiam dum nescit. &c. quia esse reliquit consilium suo, non pender ex ignorantia hominis.

33 Respondeo, negando assumptū. Optimè enim eam conuenire cum libertate docuimus supra disp. 2. q. 10. dub. 7. Neq; verò rectè, aut consonè antiquis Scholasticis, duplex indifferentia voluntatis intrinseca & extrinseca constituitur, quando una tantum est libertas formalis, eaq; intrinseca voluntati; quæ quam diu nec ab intrinseco, puta ab objecti apprehensione sua cognitiō, nec ab aliqua causa extrinseca tollitur aut impeditur, impossibile est, vt voluntatis libertas seu indifferentia villo modo impediatur. Ab extrinseca vero causa tolli non potest, aut impediti, nisi hæc intrinsece aliquo modo voluntatē afficiat, ciusq; connaturalē agendi modum inuitet, vt ibidem dictum. Quare nec proprie admodum dicitur, voluntatem ab ipsa diuina præfinitione per se ac formaliter ad eiusmodi opera prædeterminari; quia hic modus loquendi propriæ actionem seu passionem transeuntē significat, cum tamen ipsa per se præfinitio nec actio sit, nec passio transiens: securus est cum intristius dicitur: Deum apud se prædeterminasse, seu absoluто & antecedenti decreto statuisse, vt eiusmodi opera hiant, quod est verissimum.

34 Ad confirmationē pariter negatur antecedens: quia scire, se diuino consilio circa singula esse præuentum, nec fieri posse (in sensu composito) vt in re aliud & alter fiat, non tollit indifferentiam, ciue notitiam: alias in omni sententia libertas illa tolleretur; quando scimus, saltem in actionibus supernaturalibus & salutaribus, hominē gratiæ præueniente ita à Deo præueniri, vt supposita scientia media, in sensu composito, non possit aliud fieri; siquidem ex hypothesi hoc unum esse futatum Deus præuidit.

Secundò obicitur, non videri istam præfinitionem congruerē cum illa doctrina Patrum, quæ docent, præscientiā diuinam non adferre nostris operibus necessitatem; eo quod hæc non ideo futura sint, quod Deus ea præficiat, sed ideo Deus illa præficit, quia futura sunt. Nam si omnia opera bona essent absoluta voluntate præfinita, falsum esset, Deum ea nosse, quia futura; nam præsiceret ea, quia præfinita, nō quia futura; imo ideo essent futura, quia præficta: nam illa præscientia esset practica, ac proinde eorum causa. Deinde futilis fuisse illa ratio Patrum, ad ostendendum, diuinā prouidentiā non adferre necessitatem actibus humanis, si absoluta eiusmodi præfinitionē agnouissent, quæ multo magis videretur obstare libertati.

35 Respondeo, negando assumptum, loquendo, vt res ipsa postulat, de absoluta præscientia visionis. Ad primā probationem respondetur, negando primā partē sequela. Ratio enim cognoscendi futura contingentia in Deo varia est; nimur ex parte objecti, & ipsa futuritio rei (supposita in Deo ex parte subiecti infinita vi cognoscendi) & ipsa præfinitio absoluta, respectu corsi objectorum, de quibus datur; nec una altera tollit vel impedit, vt suo loco diximus, disp. 2. q. 8. dub. 6. & 7. Altera pars sequela distinguitur. Si enim sermo sit de præscientiā absoluta visionis, de qua loquuntur citati Patres, falsa est; si autem de præscientia practica simplicis intelligentiæ, vera est, & ab omnib; necessariō admittitur, iuxta illud Apostoli. Quos præficiuit,

& prædestinatus. Item, Non repulit Deus plenam, quam præsumuit, &c. Sed nihil ad propositum; quia de hac non loquuntur Sancti Patres, aut Theologi, cum aiunt, non ideo aliquid futurum, quia Deus id præsciat, sed ideo Deum præscire, quia futurū, vt pluribus dictum loc. cit.

36

Ad secundam probationem respondetur, dictū illud SS. Patrum non eō fuisse ab eis prolatum, vt integrā & adæquatā concordiam libertatis cū diuinā prouidentiā assignarent; sed solū vt cōcordiam libertatis cum præscientiā illa speculatiā tradenter, quæ ea ratione facillimē explicatur, vt nos etiam suo loco tradidimus. Interim verò nisi diuinā prouidentiā planē negare velimus, aut otiosam reddere, in omni sententiā admittendi sunt alij actus practici voluntatis & scientiæ diuinæ, ad diuinā prouidentiā spectantes, cum quibus SS. Patres, speciatim Augustinus, Anselmus, & S. Thomas, alijque Theologi, longe diuer- sam rationē conciliandæ libertatis tradiderunt, vt dictum cit. disput. 2.q.10.dub. 7. & supra q. 1. dub. 5. quam si ridet, certè nulla ex parte refellit Caluinus lib. 3. Institut. cap. 13. §. 6.

37

Tertio objicitur. Si talis præfinitio omnium bonorum operum facta est, tota ratio, cur hic & nunc tale opus cum istis circumstantijs fiat, referenda est in decretum diuinum, quod tamē videretur absurdum. I. Quia nemo cum id queritur, decretum diuinum allegat; sed vel placitum sua voluntatis, vel finem à se intentum. II. Quia, hac ratione dicendum foret, Deum ex se absolute velle, vt faciamus interdum opera imperfecta intensiū: cum tamē Deus ex se potius cupiat omnes quam perfectissimē operari. Quare etiam Sancti omnes suum temponē accusant, & queruntur se diuinæ vocationi & gratia accepta non ita respondisse, vt poterant & debebant: quod frustra facerent, si Deus ex se non maiorem mensuram intendit, sed hanc absolute præfiniuit.

Respondeo negando sequelam: non enim sequitur, toram rationem, sed ultimatam rationem boni operis in decretum diuinum, eiusque gratiam referendam: immediata enim & secundaria ratio nihilominus manet penes libertatem operantis; cum decretum diuinum, eiusque gratia præueniat quidem in eiusmodi operibus liberum arbitrium, sed eius cooperationem & libertatem non tollat, nec impedit.

38

Ad primam probationem, quatenus huic doctrina obstat, respondetur, omnes qui se gratos student exhibere Deo, suo tempore, cū id implementem venit, agnoscere & allegare pro causa salutarium suarum actionum, decretum gratiæ diuinæ præuenientis, in qua veluti causa, eiusmodi opera præfinita esse negari nullo modo potest, vt dictum assert. 5. iuxta illud Pauli, *Quis enim te discernit? & quid habes quod non acceperis? si autem acceperisti, quid gloriaris, quasi non acceperis?* Ipsam verò absolutam operum præfinitionem in se, vt pro causa assignent, non est necesse; tum quia hanc, cum subtilis sit & abstrusa, pauci intelligunt; quidam negant. Tum quia si in particulari loquuntur, nec hoc quidem satis scimus, an hæc vel illa actio nostra in individuo placeat Deo, & sit

salutaris ac pia, qualis ad salutem requiritur, iuxta illud Iob 9. vers. 28. *Verebar omnia opera mea.* Et Eccles. 9. vers. 1. *Sunt iusti atque sapientes, & opera eorum in manu Dei: & tamen nescit homo, utrum amore, an odio dignus sit.*

Ad secundam probationem respondetur, opera imperfcta dupliciter dici posse, primò solum negatiue & quasi physice; secundo contrariè & moraliter. Posteriori sensu negatur sequela; priori conceditur: nec id est absurdum; cum varietas eiusmodi operationū, vti & varia mensura gloriæ faciat tum ad maiorē commendationē diuinæ prouidentiæ; tum decorum vniuersi, vt superius diximus. Deus autē licerantercedenti & ineffaci quādam voluntate velit omnes perfectissimē operari, consequenti tamen & efficaci non item; vti omnes fateri necesse est. Sicut etiam cum bonitate auctus alicuius absoluta, quem Deus præfiniuit, stare potest tempor & ignavia in operante, qua fit, vt non plura & maiora operetur, vti absolute posset; quam Sancti omnes, etiam stante illa præfinitione, in se merito & agnoscunt, & accusant: quia præfinitio illa non tollit potestatem absolutam plura & maiora operandi. Vide dub. præc. obiect. 3.

Quarto objicitur. Pleraque opera iustorū noui testamēti ex sua ratione intrinseca, & ratione obiecti, supponunt Christum, eiusq; religionem sive doctrinam, vt est fides Christi, spes in Christum, item vsus Sacramentorum, & opera consiliorum Christi, & alia quæ Christianificant, vt vel Christus imitentur, vel ipsi placeant: atqui Christus non erat venturus in carne, si Adam nō peccasset: ergo opera iustorum saltem à toto genere non sunt præfinita ante præuisionem peccati, vt assert. 7. dictum.

Respondeo, negando consequentiam: quia nihilominus Christus prædestinatus fuit ante prædestinationem nostram, & præfinitionem bonorum operum nostrorum, vt dicetur dubio sequenti.

Quintò objicitur: et si quidē non sit facile Deo negandum, si de absolute potētia loquamur, eum gratiarū dona, & opera bona absolute, & sine illa inter se dependentia decreta per voluntatē intentionis, ita exequi posse, vt inter se habeant conciōne & dependentiam in ratione meriti & finis; id tamen sine specialissima & extraordinaria prouidentiē cura non potuisse fieri; quam Deus, nisi necessitas postulet, adhibere non consuevit: curando v.g. circa elemosynæ opus in particuliari prædefinitionem, vt tali temporis momento, tali loco concurrent egenus & diues, &c.

Respondetur, supposita scientia media, id esse facillimum; quia per eā Deus nouit infinitos quotidiano modos, quibus res præfinienda executioni mandari posset, etiam absque illa perturbatione vel iñutratione cursus quasi naturalis rerum. Nec tamen negandum, circa electos sāpē etiā extraordinariam & specialem prouidentiæ curā interuenire, vt dictum dub. 1. Quaratione etiam facile fieri potest, vt omnes particule corporum electorum sint prædefinitæ ante præuisionem cursus rerum, quatenus pendent à libertate creaturæ, & vt in vniuerso omnia ita dirigantur & disponantur, sicut ea præfinitio postulat: saltem supponen-

39

40

41

ponendo, quod secluso peccato hi ipsi, & non alij, ex hac vel illa particulari materia constantes, non ex alia, fuerint prædestinati; de qua re actum est dub. præced. obiect. 6.

42 Sextū obiectur. Afflictiones & passiones Christi, vt & aliorum Martyrum, non fuerunt prædefinitæ ante prævisionem malitia Iudeorum, seu tyranorum, suas voluntates ad illa inferēda flectentium; cum tamen sint actus præstantissimi, & excellētissima media prædestinationis, &c. Ergo multo minus credendum est, ceteros actus bonos esse præfinitos ante determinationem nostre co-operationis & prævisionem peccati.

Ad hoc, omilla responsonē quorundam, qui negant antecedens, quos bene refellit opposens, responderetur ex dictis assert. 7. negando consequētiā. Tum quia prædefinitione operante prævisionem peccati, per se non pendet aut desumitur ex operis præstantia; sed ex independentia à peccato; quafit, vt etiam opus ipsum ita prædefiniatur, nō tamē vlo modo nec formaliter, nec virtualiter præfinitum censeatur peccatum: sicut sit, quando opus ipsum intrinsecē dependet à peccato, vt dicitū. Tū quia aliud est, opus aliquod bonū prædefiniri ante prævisionem peccati, quod intrinsecē supponit; aliud ante coagitionē, seu determinatione ipsius operatis & efficiētis opus illud bonū. Etenim passiones Christi & Martyrum prædefinitæ sunt, ante determinationem voluntatis Christi & Martyrum ad eas passiones re ipsa suscipiendas. vti & opera bona cetera prædestinatorum; sed non ante prævisionem peccati, seu voluntatis malæ, qua Iudei & tyrranni se ad eas passiones inferandas nefariè determinatur erant.

43 Septimū obiectur. Daud non videtur rex fuisse futurus, si Saul nō peccasset, vt colligitur ex 1. Reg. 13. Eodem modo Ioseph non fuisset factus princeps Egypti, nisi à fratribus fuisset venditus, vt colligitur ex Genesis 37. Neceversa per Chaldeos fuisset Ierosolyma, si obstinatio Sedechie nō fuisset, vt colligitur ex Ieremias 38. Ergo res hæc, quæ tamen nec intrinsecē supponit peccata illa, de quibus sermo est, & sunt maximi momenti respectu gubernationis Vniuersitatis, nō fuerunt prædefinitæ ante prævisionem illorum peccatorum: Ergo nec actus ceteri prædefiniuntur ante prævisionem peccatorum, aut determinationis nostræ.

Respondeatur primo, negando primam consequētiā. Nam quamvis hæc omnia fuisse præfinita ante prævisionem peccatorum, de quibus in obiectione sermo est, nihilominus tamen fieri poterat, vt antecedentia singula futura non essent, nisi futura essent peccata illa consequētia; eo quod secundum ordinem dependentia, seu quo ad subsistendi consequētiam, dependenter à peccatis illis, de quibus sermo est, præfinita essent, vt superius disp. 2. q. 10. dub. 6. generatim diximus. Respondeatur secundo, ex scriptura plus non colligi, quām res illas futuras non fuisse, si peccata illa non essent, respiciendo ad integrum decretum Dei, quod habebat de rebus illis non tantum præfiniendis, sed etiam exequēdis, quamvis enim Deus habuerit decretum illas res perficiēdi ordine intentionis prius prævisione seu per-

missione illorum peccatorum; habuit tamen aliud decretum executiū, eas non exequendi, nisi ex occasione peccatorum.

Atque hæc de præfinitione particulari bonorum operum prædestinati: ex quibus etiam colligitur, prædestinationem gratitudinem ad gloriā absolute quidē non nisi prædefinitione particulari bonorum operum, vel contra: nihilominus tamen hæc duo optimè inter se consentire, & vicissim vñ ab altero non parum confirmari.

D V B I V M VII.

Verum in diuina mente secundum rationem nostram prior sit prædestinationis Christi, quam hominum, seu Angelorum.

S. Thom. 1. p. q. 23. a. 5.

Q Væstio procedit de ordine intentionis, non executionis: & quia res hæc propriè spectat ad tertiam Partem, vbi de Incarnatione agitur, breviter est hoc loco absoluenda, suppositis ijs, que supra q. 4. dub. 2. de causa prædestinationis exparte meritorum Christi, dicta sunt.

Affertio I. Christus secundum substantiam, & vt caput hominum, electus ac prædestinatus fuit, ante electionem hominum. Ita sentiunt ac docēt communiter Theologi, dum affirunt, Christi prædestinationem esse causam (efficientem nimurum, finalē & exemplarem) nostræ prædestinationis, in quibus S. Thomas 3. p. q. 24. a. 4. Caicetus & Thomistæ recentiores ibidem, Aienensis 3. p. q. 3. memb. 5. Bonaventura in 3. d. 1. a. 1. q. 3. Albert⁹ d. 10. a. vlt. Richardus a. 4. q. vlt. Durandus q. 3. Paludanus q. 1. a. 3. vt & alij, qui docent, Christum promeritum esse prædestinationem nostram in ordine ad omnes effectus: in quibus sunt Vega l. 4. in Concil. Trid. sess. 5. Viguerius Inst. Theol. c. 20. §. 8. v. 3. Eckius in Chrysopallo cent. 3. n. 34. Gregorius de Valentia hic q. 23. p. 4. § 1. Suarez l. 2. de prædest. cap. 22. & 24. num. 12. & 38. & 3. p. t. 1. disp. 41. sect. 4. Vasquez disp. 91. num. 2. & disp. 94. cap. 2. & 4. Denique idem sentiunt non solum omnes illi, qui dicunt Christum venturum fuisse, etiamsi Adam non peccasset, in quibus Aienensis, Albertus, Scotus, Rupertus, Galatinus, Viguerius, Iacobus Valentia, Pighius, Catharinus, Eckius, cent. 1. num. 451 Fonseca in Metaph. to. 3. Suarez 3. p. tom. 1. disput. 5. sect. 5. & magis propender Salmerontom. 15. disp. 3. Sed ex alijs etiam Albertinus tom. 1. princ. 6. corol. 1. num. 25. Sed & Molina hic quæst. 23. art. 4. & 5. disp. 1. mem. 8. integrum relinquunt existimare, prædestinationem Christi, si cum singulorum hominum prædestinatione in particulari comparetur, priorem esse nostro intelligendi modo, quam prædestinationem singularum, qui in ipso prædestinati sunt, tanquam causam & exemplar prædestinationis ceterorum, & tanquam finem, principium, ac sonem; unde media prædestinationis ceterorum derivata sunt: quicquid antea secus dixisse visus fuerit.

Proba-